

治河通考

治河通考序

訥菴吳公巡撫河南之踰年貞度飭務  
體宏理密謂河之災後修塞勢煩足當  
一邊之擾既擇才而任脫夏邑之淤道  
趙皮之豬又命前御史劉陽氏輯河書  
開封顧守鐸刻板畢登良策可稽而法  
焉嗟乎聖神如禹雖曰十有三載乃績  
然不能繇後害自漢以來知議之能行

之勇力之腐舌刮齒焦心銷骨多者十  
數年少者一二年輒決夷屋寢畝飄資  
蕩生天子親沉璧馬臨水太息

國家都蕪輓江南之粟上下咸寄命焉既  
賴河以利舟楫亦恐其遂齒漕渠粟至  
稍後舉國困憊一邑一郡之災不暇恤  
矣夫濬故道分橫流而後安舍是亡策  
矣然沙積地高道然後塞升沙並岸水

至復然萬人之功付於烏有不若隨勢  
相宜別就奏下之利而道之毋與水爭  
毋犯水怒毋惜棄田毋阻多口所占田  
廬量給之費而蠲其租民亦樂從况並  
河之田有填淤之饒可相易乎夫物敝  
有因水決以漸此塞彼行非由齊發蟻  
穴可以毀防線隙可以崩郭故貴乎先  
事而脩一歲不溢遂幸無為玩日愒月

坐待其不支况乎遷代之速不盡其才  
官設之分不專其任卷埽築堤姑具苟  
完買逸騰賈非利公家乎今夫農之作  
垣也其基厚其上塗題畚孔良築削孔  
力雖遭秋霖泛潦亡傷豪末官府作墉  
或破百金不月而摧何哉農自為而官  
為人也嘉靖癸巳春二月辛巳相臺崔  
銑序

赤里出

忽蘭水

脫可尼

即府河

別站

闕即

乞里塔

澤

澤

澤


萬崙


乃朵甘思

河源圖

龍梅牙


哈刺寬











黃河圖


潼關


閿鄉縣


靈寶縣


三門


七津











柘城縣

鹿邑縣

太和縣

潁州

潁河潁上縣

雙河口

小清河

歸德州

亳州

渦河

白龍王廟

夏邑縣

七女城縣

永城縣

丁家道口

鳴山縣

鹿邑縣

單縣

舊日被水冲全  
寨陳德榮家  
二口皆為乾地

莘家集  
安陶縣  
雙湖

官路集

安化集

郭家嘴

城武縣

荷村

鉅野縣

金鄉縣

丁嘉祥

安平鎮

淮河

郵城縣







治河通考卷之一

河源考

夏書禹貢

導河積石至于龍門南至于華陰東至于底磻柱  
又東至于孟津東過洛汭至于大伾北過泝水  
至于大陸又北播為九河同為逆河入于海

蔡傳曰河自積石三千里而後至龍門經但一  
書積石不言方向荒遠在所畧也龍門而下因  
其所經記其自北而南則曰南至華陰記其自  
南而東則曰東至底柱又詳記其東向所經之

地則曰孟津曰洛汭曰大伾又記其自東而北則曰北過洛水又詳記其北向所經之地則曰大陸曰九河又記其入海之處則曰逆河自洛汭而上河行于山其地皆可考自大伾而下垠岸高于平地故決蓄流移水陸變遷而降水大陸九河逆河皆難指實然上求大伾下得碣石因其方向辨其故迹則猶可考也

程氏曰自洛汭以上山水名稱迹道古今如一自大伾以下不特水道難考雖名山舊嘗憑河者亦復不可究辨非山有徙移也河既變遷年

世又遠人知新河之為河不知舊山之不附新  
河輒並河求之安從而得舊山之真歟

西漢書張騫傳

漢使窮河源其山多玉石采來天子案古圖書名  
河所出山崑崙云

西漢書西域志

西域中央有河其河有兩原一出葱嶺山下一出  
于闐于闐在南山下其河北流與葱嶺河合東注  
蒲昌海蒲昌海一名鹽澤者也去玉門陽關三百  
餘里廣袤三百里其水停居冬夏不增減皆以為

潛行地下南出於積石

山海經

崑崙山縱橫萬里高萬一千里去嵩山五萬里有  
清河白河黃河黑河環其墟其白水出其東北陬  
屈向東南流為中國河河百里一小曲千里一大  
曲發源及中國大率常然東流潛行地下至規期  
山北流分為兩源一出葱嶺一出于闐其河復合  
東注蒲昌海復潛行地下南出積石山西南流又  
東迴入塞過燉煌酒泉張掖郡南與洸河合過安  
定北地郡地流過朔方郡西又南流過五原郡南

又東流過雲中西河郡東又南流過上都河東郡西而出龍門汾水從東於北入河東即龍門所在龍門未開河出孟門東大溢是謂洪水禹鑿龍門始南流至華陰潼關與渭水合又東迴砥柱砥柱山名河水分流包山而過山見水中若柱然今陝州東河北陝縣三縣界及洛陽孟津所在至鞏縣與洛水合成臯與濟水合濟水出河北至王屋山而南截河渡正對成臯又東北流過武德與沁水合至黎陽信都信都今冀州絳水所在絳水亦曰潰水一曰漳水鉅鹿之北遂分為九河鉅鹿今邢

州大陸所在大陸澤名九河一曰徒駭二太史三  
馬頰四覆釜五湖蘇六簡七絜八鉤盤九鬲津又  
合為一河而八海濟相公塞九河以廣田居故館  
陶具丘廣川信都東光河間以東城池九河舊跡  
猶存漢代河決金隄南北多懼其害議者常欲求  
九河故迹而穿之未知其所是以班固云自茲距  
漢以亡其八枝河之故瀆自沙丘堰南分也出焉  
故尚書稱導河積石至于龍門今絳州龍門縣東  
南至于華陰北至于砥柱東至于孟津在洛北都  
道所奏古今以為津東過洛汭至于大伾洛汭今

鞏縣在河洛合流之所也大伾山今汜水縣即故  
成臯也山禹成曰伾北過水至於大陸其絳水今  
冀州信都大陸澤名今邢州鉅鹿又北播為九河  
同為逆河入海是也同合出九河又合為一名為  
逆河逆行也言海口有潮汐以迎河水

水經 酈道元注

崑崙墟在西北

三成為崑崙丘崑崙說曰崑崙之山二級下曰  
樊桐一名板松二曰玄圃一名閼風上曰層城  
一名天庭是謂太帝之居



去嵩高五萬里地之中也

禹本紀與此同高誘稱河出崑山伏流地中萬  
三千里禹導而通之出積石山按山海經自崑  
崙至積石一千七百四十里自積石出隴西郡  
至洛隼地志可五千餘里

河水出其東北陬

春秋說題辭曰河之為言荷也荷精分布懷陰  
引度也釋名曰河下也隨地下處而通流也考  
異郵曰河者水之氣四瀆之精也所以流從元  
命苞曰五行始焉萬物之所由生元氣之騰液

也孝經援神契曰河者水之伯上應天漢風俗  
通曰江淮河濟為四瀆四瀆通也所以通中國  
垢濁白虎通曰其德著大故稱瀆

屈從其東南流入于渤海

山海經曰南即從極之淵也一曰中極之淵深  
三百仞唯馮夷都焉括地圖曰馮夷恒乘雲車  
駕二龍河水又出於陽紆陵門之山而注於馮  
逸之山

又出海外南至積石山下有石門河水冒以西南  
流河水又南入葱嶺山

河水重源有三非為二也一源西出捐毒之國葱嶺之上西去休循二百餘里皆故塞種也南屬葱嶺高千里西河舊事曰葱嶺在燉煌西八千里其山高大上生葱故曰葱嶺也

又西逕蜀賓國北

月氏之破塞王南君蜀賓治循鮮城土城平和無所不有金銀珍寶異畜奇物踰於中夏大國也

又西逕月氏國南又西逕安息南與峴羅跋禰水同注雷翁海

釋氏西域傳曰覓羅跋禰出阿耨達山西之北  
逕于闐國漢書西域傳曰于闐以西水皆西流  
注于西海

又西逕四大塔北又西逕陀衛國北河水又東逕  
皮山國北其一源出于闐國南山北流與葱嶺河  
合東注蒲昌海

又西北流注于河

即經所謂北注葱嶺河也

南河又東逕于闐北

釋氏西域記曰河水東流三千里至于闐屈東

北流者也漢書西域傳曰于闐已東水皆東流  
南河又東北逕杆彌國北又東逕且末國北

北河又東北流分為二水枝流出焉北河自踈勒  
逕流南河之北

北河又東逕莎車國南

治莎車域西南治去蒲黎一百四十里漢武帝  
開西域田於此有鐵山出青玉

北河之東南逕温宿國

治温城上地物類與鄯鄯同北至烏操赤谷六  
百一十里東通姑墨二百七十里於此枝河右

入北河

北河又東逕姑墨國南

入姑墨川水注之導姑墨西北赤沙山東南流逕姑墨國西治南至于闐馬行十五日

河水又東逕注賓城南又東逕樓蘭城南而東注河水又東注于沕澤

即經所謂蒲昌海也水積鄯鄯之東北龍城之西南龍城故姜賴之靈胡之大國也蒲海溢盪覆其國城基尚存而至大晨發西門暮達東門澮其岸岸餘溜風吹稍成龍形皆西面向海因

名龍城

又東入塞過燉煌酒泉張掖郡南

河水又自東河曲逕西海郡南

河水又東逕允川而歷大榆谷北

又東過隴西河關縣北洸水從東南來流注之

河水又東北流入西平郡界左合二川南流又河

河水東又逕澆河故城北又東北逕黃川城河水

又東逕石城南左合北谷水又東北逕廣遠城北

又合烏頭川水河水又東臨津溪水注之東逕赤

岸北洸水注之又東過金城允吾榆中天水安定

北界麥田山河水東北流逕於黑城北又東北高  
平川水注之又北過北地富平縣西

以後俱逕晉地

又南出龍門口汾水從東來注之南逕于夏石室  
又南至華陰潼關渭水從西來注之河水歷船司  
空與渭水會河水又東北至澗水注之又東過砥  
柱間河之右則峭水注之河水又東于峭之水注  
焉又東過平陰縣北又東至鄧清水從西北來注  
之又東逕平陰縣北河水右會淇水河水又東過  
平陰縣北淇水從北來注之河水又東



河水又東逕洛陽縣北河水又東淇水入焉又東沛水注焉又東過鞏縣北洛水從縣西北流注之又東過成臯縣北濟水從北來注之

河水東逕成臯大伾山下南對玉門又東合汜水又東逕五龍塢北又東過滎陽縣浪蕩渠出焉

河水又東北逕卷之扈亭北德縣東沁水從之東至酸棗縣西濮水東出焉河水又東北通謂之延津又逕東燕縣故城北則有濟水自北來注之

河水又東淇水入焉又東逕遮害亭南又右逕滑臺城又東北過黎陽縣南自津東北逕涼城縣又

東北逕伍子胥廟南又東北為長壽津

至于大陸北播于九河

以後俱逕衛魯趙地北入海

元史河源附錄

河源古無所見禹貢導河止自積石漢使張騫持節通西域度玉門見二水交流發葱嶺超于闐雁鹽澤伏流千里至積石而再出唐薛元鼎使吐蕃訪河源得之於悶磨黎山然皆歷歲月涉艱難而其所得不過如此世之論河源者又皆推本二家其說恠誕總其實皆非本真意者漢唐之時外夷

未盡臣服而道未盡通故其所往不無迂回艱阻不能直抵其處而究其極也元有天下薄海內外人迹所及皆置驛傳使驛往來如行國中至元十七年命都實為招討使佩金虎符往求河源都實既受命是歲至河州州之東六十里有寧河驛驛西南六十里有山曰殺馬關林麓窮隘舉足浸高行一日至巔西去愈高四閱月始抵河源是冬還報并圖其城傳位置以聞其後翰林學士潘昂霄從都實之弟開闢出得其說撰為河源臨川朱思本又從公八里吉思家得帝師所藏梵字圖書而

以華文譯之與昂霄所志互有詳畧今取二家之  
書考定其說有不同者附注于下按河源在吐蕃  
朶甘思西鄙有泉百餘泓沮洳散渙弗可逼視方  
可方八十里履高山下瞰縹若列星以故名火敦  
腦兒火敦譯言星宿也思本曰河源在中州西南  
直四川馬湖蠻部之正西三千餘里雲南麗江  
宜撫司之西北一千五百餘里帝思撒思加地  
之西南二千餘里水從地涌出入井其井百餘  
東北流百餘里匯為大澤曰火敦腦兒群流奔  
轉近五七里匯二巨澤名阿剌腦兒自西而東連

屬吞噬行一日迤邐東驚成川號赤賓河又二三日水西南來名赤里出與赤賓河合又三四日水來南名忽闌又水東南來名也里木合流入赤賓其流浸大始名黃河然水猶清人可涉思本曰忽闌河源出自南山其地大山峻嶺綿亘千里水流五百餘里注也里出河也里出河源亦出自南山西北流五百餘里與黃河合又一二日岐為八九股名也孫幹倫譯言九渡通廣五七里可度馬又四五日水渾濁土人抱革囊騎過之聚落糾木幹象舟傳髦革以漚僅容兩人自是兩山峽

東廣可一里二里或半里其深叵測朶甘思東北  
有大雪山名亦耳麻不莫刺其山最高譯曰騰乞  
里塔即崑崙也山腹至頂皆雪冬夏不消土人言  
遠年成冰時六月見之自八九股水至崑崙行二  
十日思本日自渾水東北流一百餘里與懷里九  
禿河合懷里火禿河源自南山正北偏西流八  
百餘里與黃河合又東北流一百過即麻哈地  
又正北流一百餘里乃折而西北流二百餘里  
又折而正北流一百餘里又折西而東流過崑  
崙山下番名亦耳麻不刺其山高峻非常山麓

綿亘五百餘里河隨山足東流過撒思家即闊  
闊提地河行崑崙南半日又四五日至地名而  
闊及闊提二地相屬又三日地名哈刺別里赤兒  
四達之衝也多寇盜有官兵鎮之近北二日河水  
過之思本日河過闊提與亦西八思今河合亦西  
八思今河源自鐵豹嶺之北正北流凡五百餘  
里而與黃河合崑崙以西人簡少多處山南山  
皆不穹峻水益散漫獸有鬣牛野馬狼狽羱羊之  
類其東山益高地益漸下岸狹隘有狐可一躍而  
越之處行五六日有水西南來名納隣哈刺譯言

細黃河也思本曰哈刺河自白狗嶺之北水西北  
流五百餘里與黃河合又兩日水南來名乞兒  
馬出二水合流入河思本曰自哈刺河與黃河合  
正北流二百餘里過河以伯站折而西北流經  
崑崙之北二百餘里與乞里馬出河合乞里馬  
出河源自威茂州之西北岷山之北水北流即  
占當州境正北流四百里折而西北流又五百  
餘里與黃河合河水北行轉西流過崑崙北一  
向東北流約行半月至歸德州地名必赤里始有  
州治官府州隸吐蕃等處宣慰司司治河州又四



五日至積石州即禹貢積石五日至河州安鄉關  
一日至打羅坑東北行一日洮河水南來入河思  
本曰自乞里馬出河與黃河合又西北流與鵬  
援河合鵬援河源自鵬援山之西北水正西流  
七百餘里通禮塞塔失地與黃河合折而西北  
流三餘里又折而東北流過西寧州貴德州馬  
嶺凡八百餘里與邈水合邈水源自青唐宿軍  
谷正東流五百餘里過三巴站與黃河合又東  
北流過土橋站古積石州來羗城廓州構米站  
界都城凡五百餘里過河州與野龐河合野龐

河源自西傾山之北水東北流凡五百餘里與  
黃河合又東北流一百餘里過踏白城銀川站  
與湟水浩疊河合湟水源自祁連山下正東流  
一千餘里注浩疊河浩疊河源自剛丹州之南  
剛丹州下水東南流七百餘里注黃水然後與  
黃河合又東北流一百餘里與洮河合洮河源  
自羊撒嶺北東北流過臨洮府凡八百餘里與  
黃河合又一日至蘭州過北卜渡至鳴沙河過  
應吉里州正東行至寧夏府南東行即東勝州隸  
大同路自發源至漢地南北澗溪細流旁貫莫知

紀極山皆石至積石方林木暢茂世言河九折  
彼地有二湖蓋乞兒馬出及貴德必赤里也思本  
曰自飛水與河合北流過達地凡八百餘里過  
豐州西受降城折而正東流過達達地古夫德  
軍中受降城東受降城凡七百餘里折而正南  
流過大同路雲內州東勝州與黑河合黑河源  
自漢陽嶺之南水正西流凡五百里與黃河合  
又正南流過保德州及與州境又過臨州凡一  
千餘里與吃那河合吃那河源自古宥州東南  
流通陝西有綏德州凡七百餘里與黃河合又

南流三百餘里與延安河合延安河源自陝西  
蘆子關亂山中南流三百餘里過延安府折而  
正東流三百里與黃河合又南流三百里與汾  
河合汾河源自河東朔武州之南亂山中西南  
流過管州冀寧路汾州霍州晉寧路絳州又西  
流至龍門凡一千二百餘里始與黃河合又南  
流二百里過河中府過潼關與太華太山綿亘  
水勢水可復南乃折而東流大槩河源東北流  
所歷皆西蕃地至蘭州凡四千五百餘里始入  
中國又東北流過達達地凡二千五百餘里始

入河東境內又南流至河中一千八百餘里通計九千餘里

國朝河南總志所載河源及繞雖畧於古說然詳于近蹟今亦附錄于右

黃河源出西蕃星宿海貫山中出至西戎名細黃河繞崑崙至積石經陝西山西境界至河中潼關流經河南之閿鄉靈寶陝西池新安濟源孟津孟鞏溫汜水武陟河陰原武滎澤陽武中牟祥符尉氏陳留通許杞太康睢寧陵歸德諸州縣至直隸亳縣馬丘村合馬腸河城西北合渦河東至直隸

懷遠縣之荆山合淮其在孟津西有楊家灘西北  
有羅家灘杏園灘馬糞灘築護民堤三百十五丈  
永安堤一百二十丈以防漫流又有支流一自祥  
符縣西南八角決八安家河一股從朱仙鎮閘店  
流經尉氏一股從三里岡劉岡流經通許北境俱  
至扶溝鐵佛寺合流經西華會沙河潁河入北湖  
又經商水項城之南頌至直隸壽州西至正陽鎮  
合淮一自祥符縣白墓子岡決入流經通許杞太  
康之馬樞焦舊名馬儼河又經柘城縣鹿邑東北  
境合渦河至亳縣北關仍入本河合淮俱入海

治河通考卷之二

河決考

河徙壅附

周定王五年河徙砠磔

晉景公十五年穀梁傳曰梁山崩壅河三日不流  
晉君召伯尊伯尊遇輦者問焉輦者曰君親素縞  
帥群臣哭之既而祠焉斯流矣伯尊至君問之伯  
尊如其言而河流佐傳曰

漢

文帝

十二年冬十二月河決酸棗東潰金隄

武帝

建元三年河水溢于平原

元光三年春河水徙從頓丘東南流夏復決濮陽  
瓠子注鉅野通淮泗汎郡十六

元帝

永光五年冬十二月河決初武帝既塞宣房後河  
復決於館陶分為屯氏河東北入海廣深異  
河等故因其自然不隄塞也是歲河決清河靈鳴  
犢口而屯氏河絕

成帝



建始四年夏四月河決東郡金隄灌四郡三十二縣居地十五萬頃壞官亭廬舍且四萬所

河平三年秋八月河復決平原流入濟南千乘所壞敗者半建始時復遣王延世作治六月乃成鴻嘉四年秋渤海清河信都河水溢溢灌縣邑三十一敗官亭民舍四萬餘所

新莽二年河決魏郡泛清河以東數郡先是莽恐河決為元城塚墓害及決東去元城不憂水故遂不隄塞

唐

玄宗

開元十年博州河決○十四年魏州河溢○十五年冀州河溢

昭宗

乾寧三年夏四月河漲將毀滑州朱全忠決為二河夾城而東為害滋甚

後唐

同光二年秋七月唐發兵塞決河先是梁攻楊劉決河水以限晉兵梁所決河連年為曹濮患命將軍婁繼英督汴滑兵塞之未幾復壞

晉

天福二年河決鄆州○四年河決博州○六年河決滑州

開運三年秋七日河決揚劉西入莘縣廣四十里自朝城北流

漢

乾祐元年五月河決魚池○三年六月河決鄭州

周

廣順二年十二月河決鄭州滑州周遣使脩塞周主以決河為憂王浚請自行視許之周塞決河三

月澶州言天福十一年黃河自觀城縣界楚里村隄決東北經臨黃觀城兩縣隔絕鄉村人戶今觀城在河北隔三村在河南今臨黃在河南隔八村在河北官吏節級徵督賦租取路於州橋迂曲僅數百里每事多違程限其兩縣所隔村鄉擬迴管係所冀便於徵督候堙隄岸河流復故兩縣仍舊收管從之

宋

太祖

乾德二年赤河決東平之竹村七州之地復隄水

災三年秋大雨霖開封府河決陽武又孟州水漲壞中渾橋梁澶鄆亦言河決

四年八月滑州河決壞靈河縣大隄

開寶四年十一月河決澶淵泛數州官守不時上言通判司封郎中姚恕棄市知州杜審肇坐免

太宗

太平興國二年秋七月河決孟州之溫縣鄭州之滎澤澶州之頓丘

七年河大漲感清河凌鄆州城將陷塞其門急奏以聞詔殿前承旨劉吉馳往固之

八年五月河大決滑州韓村泛澶濮曹濟諸州民  
田壞居人廬舍東南流至彭城界入于淮

九年春滑州復言房村河決

淳化四年十月河決澶州陷北城壞廬舍七千餘  
區

真宗

咸平三年五月河決鄆州王陵埽浮鉅野入淮泗  
水勢悍激侵迫州城

景德元年九月澶州言河決橫壠埽

四年又壞王八埽並許詔發兵夫完治之

大中祥符三年十月判河中府陳堯叟言白浮圖  
村河水決溢為南風激還故道明年遣使滑州經  
度兩岸開減水河九月棣州河決聶家口

五年正月本州請徙城帝曰城去決河尚十數里  
居民重遷命使完塞既成又決于州東南李氏灣  
環城數十里民舍多壞又請徙商河役興踰年雖  
扞護完築裁免決溢而湍流益暴孺地益削河勢  
高民屋殆踰丈矣民苦久後而終憂水患

六年乃詔徙州于陽信之八方寺

七年詔罷葺遙堤以養民力八月河決澶州大吳

婦

天禧三年六月乙未夜滑州河溢城西北天臺山  
旁俄復潰于城西南岸摧七百步漫溢州城歷澶  
濮曹鄆注梁山泊又合清水古汴渠東入于淮州  
邑罹患者三十二

仁宗

天聖六年六月河決澶州之王楚婦凡三十步  
明道二年徙大名之朝城縣于杜婆村廢鄆州之  
王橋渡淄州之臨河鎮以避水

景祐元年七月河決澶州橫壠婦



慶曆八年六月癸酉河決商胡埽決口廣五百五十七步

皇祐元年三月河合永濟渠注乾寧軍

二年七月辛酉河復決大名府館陶縣之郭固

四年正月乙亥塞郭固而河勢猶壅議者請開六塔以拔其勢

嘉祐元年夏四月壬子朔塞商胡北流入六塔河不能容是夕復決溺兵夫漂芻藁不可勝計令三司鹽鐵判官沈立往行視而脩河官皆謫竄

神宗

熙寧元年六月河溢恩州烏攔堤又決冀州棗強  
埽北注瀛七月又溢瀛州樂壽埽

四年七月辛卯北京新堤第四第五埽決漂溺館  
陶永濟清陽以北八月河溢澶州曹村十月溢衛  
州王供時新堤凡六埽而決者二下屬恩冀貫御  
河奔衝為一

十年五月滎澤河決急詔判都水監俞光往治之  
是歲七月河復溢衛州王供及汲縣上下埽懷州  
黃沁滑州韓村乙丑遂大決於澶州曹村澶淵  
流斷絕河道南徙東匯于梁山張澤灤分為二流

一合南清河入于淮一合北清河入于海凡灌縣四十五而濮濟鄆徐尤甚壞田逾三十萬頃

丘公大學衍義補曰此黃河入淮之始然北特其支流由汴入泗至清河口入淮者耳

八月又決鄭州滎澤

元豐元年四月丙寅決口塞詔改曹村埽曰靈平五月甲戌新堤城閉口斷流河復歸北

三年七月澶州孫村陳埽及大吳小吳埽決

四年四月小吳埽復大決自澶注入御河恩州危甚

五年六月河溢北京內黃埽七月決大吳埽堤以紆靈平下埽危急八月河決鄭州原武埽溢入利津陽武溝刀馬河歸納梁山濼

七年七月河溢元城埽決橫堤破

八年三月哲宗即位宣仁聖烈皇后垂簾河流雖北而孫村低下夏秋霖雨漲水往往東出小吳之決既未塞十月又決大名之小張口河北諸郡被水災

元符三年四月河決蘇村

徽宗

大觀元年丙申邢州言河決陷鉅鹿縣詔遷縣於高地庚寅冀州河溢壞信都南宮兩縣

六年四月辛卯高陽關路安撫使吳玠言冀州棗強縣黃河清詔許稱賀七月戊午太師蔡京請名三山橋銘閣曰績禹繼文之閣門曰銘功之門十月辛卯蔡京等言冀州河清乞拜表稱賀

宣和元年九月辛未蔡京等言南丞管下三十五埽今歲漲水之後岸下一例生灘河行中道實由聖德昭格神祇順助望宣付史館詔送秘書省

二年九月己卯王黼言昨孟昌齡計議河事至滑

州韓村埽檢視河流衝至寸金潭其勢就下未易  
禦遏近降詔旨令就畫定港灣對開直河方議開  
鑿忽自成直河一道寸金潭下水即安流在役之  
人聚首仰嘆乞付史館仍帥自官表賀從之

三年六月河溢冀州信都十一月河決清河埽是  
歲水壞天成聖功橋官吏刑罰有差

元

世祖

至元九年七月衛輝路新鄉縣廣盈倉南河北岸  
決五十餘步八月又崩一百八十三步其勢未已

去倉止三十步

二十三年河決衝突河南郡縣凡十五處役民二十餘萬塞之

二十五年汴梁路陽武縣諸處河決二十二所漂蕩麥禾房舍委宣慰司督本路差夫脩治

成宗

大德元年秋七月河決杞縣蒲口塞之明年蒲口復決塞河之役無歲無之是後水北入復河故道  
二年秋七月大雨河決漂歸德屬縣田廬禾稼  
三年五月河南省言河決蒲口兒等處侵歸德府

數郡百姓被災

武宗

至大二年秋七月河決歸德又決封丘

仁宗

延祐七年七月汴城路言滎澤縣六月十一日河決塔海莊東堤十步餘橫隄兩重又決數處二十三日夜開封縣蘇村及七里寺復決二處

泰定帝

泰定二年五月河溢汴梁

三年河決陽武漂民居萬六千五百餘家尋復壞



汴梁樂利隄發丁夫六萬四千人築之

文宗

至順元年六月曹州濟陰縣河防官言六月五日魏家道口黃河舊堤將決不可脩築募民脩護水月堤復於近北築月堤未竟至二十一日水忽泛溢新舊三堤一時咸決明日外堤復壞有蛇時出沒於中所下搯土一掃無遺

順帝

至正四年夏五月大雨二十餘日黃河暴溢水平地深二丈許北決白茅隄六月又北決金隄並河

郡邑濟寧軍州虞城碭山金鄉魚臺豐沛定陶楚丘武城以至曹州東明鉅野鄆城嘉祥汶上任城等處皆罹水患民老弱昏墊壯者流離四方水勢北侵安山沿入會通運河延袤濟南河間將壞兩漕司鹽塲

五年河決濟陰漂官民廬舍殆盡

六年是歲河決

二十六年春二月黃河北徙先是河決小疏口達于清河壞民居傷禾稼至是復北徙自東明曹濮下及濟寧民皆被害

國朝

洪武二十四年河決原武之黑陽山東經開封城北五里又南行至項城經潁州潁上東至壽州正陽鎮全入于淮而故道遂淤

永樂九年復疏入故道

正統十三年又決滎陽東過開封城之西南自是汴城在河之北矣又東南經陳留自亳入渦口又經蒙城至懷遠東北而入淮焉

天順六年河溢決開封城北門滄毀官民軍舍

弘治二年河徙汴城東北過沁水溢流為二一自

祥符于家莊經蘭陽歸德至徐邳入于淮一自荆  
隆口黃陵岡經曹濮達張秋所至壞民田廬

六年夏雨漲遂決張秋東岸并汶水奔注于海運  
道淤涸

正德四年九月河決曹縣楊家口長四百五十丈  
水深三文奔流曹單二縣達古蹟王子河直抵豐  
沛舟楫通行遂成入河

五年二月起工脩治至五月中雨漲埽基衝蕩不  
克完合

八年七月河決曹縣以西娘娘廟口孫家口二處

從曹縣城北東行而曹單居民似害益甚本年四月二十四日驟雨漲娘娘廟口以北五里焦家口衝決曹單以北城武以南居民一而廬盡被漂沒

附錄

黃河故道

古自陽武北新鄉西南入境東北經延津汲胙城至北直隸濬縣太伾山北入海即禹貢導河東過洛汭至於大伾處地至魏郡鄴縣有故大河在東北直達于海疑即禹之故河也周定王五年河徙則非禹之所穿漢文帝十二年河決酸棗東南流

經封丘入北直隸長垣縣至山東東昌府濮州張  
秋入海五代至宋兩決鄭州及原武東南陽武南  
流經封丘于家店祥符金龍口陳橋北經蘭陽儀  
封入山東曹縣境分為二派其一東南流至徐州  
入泗其一東北流合會通河

國朝洪武七年至十八年二十四年陽武原武祥符  
凡四度滄沒護城堤又決陽武西南東南流經封  
丘陡門祥符東南草店村經府城北五里東過焦  
橋南過蘇村至通許西南分九道名九龍口又南  
至扶溝太康陳項城諸州縣境入南直隸太和縣

合淮正統十三年河溢仍循陽武故道直抵張秋  
入海今皆淤平地其自滎陽縣築堤至千乘海口  
千餘里名金堤自河內北至黎陽為石隄激使東  
抵東郡為平剛西北抵黎陽觀下東北抵東郡津  
北西北至魏郡昭陽又自汲縣築隄東接胙城抵  
直隸滑縣界西接新鄉獲嘉縣界東南接延津縣  
界名護河隄在滎陽縣東南二十里中牟縣東北  
境名官渡即曹操與袁紹分兵相拒處築城築臺  
皆名官渡在汲縣東南境名延津置關亦名延津  
又置關名金隄在新鄉南境有八柳渡皆因河徙

而廢

國朝于祥符置河清巡檢司清河大梁陳橋三驛陳橋遮運所封丘縣置中灤巡檢司中灤新莊二驛儀封縣置大岡驛大岡遮運所通許縣置雙溝驛太康縣置義安驛長嶺遮運所扶溝縣置崔橋驛陳州置宛丘驛淮陽遮運所項城縣置武丘驛皆因河徙而革

黃陵岡口塞於弘治乙卯築三巨堤而防護之逼水南行運道無虞矣正德癸酉巨浪橫奔頭堤二堤俱打在河南止存三堤暴水湧衝堤去十分之



八總理副都御史保定劉公齋沐致祭退百二十步事聞

朝廷

天子遣劉公諭祭謝焉今正德丙子又北侵水至大堤

欽差總理河道工部右侍郎兼都察院左僉都御史安福趙公同漳於季春沐浴齋戒以祭河神季夏水發漳又潔已而祭遂遠退八里曹濮等處兵備兼理河道新安吳漳書

王氏炎曰周定五年河徙已非禹之故道漢元

光三年河徙東郡更注渤海繼決于瓠子又決于魏之館陶遂分為屯氏河大河在西屯河在東二河相並而行元帝永光中又決于清河靈鳴犢口則河水分流入于博州屯河始壅塞不通後二年又決於平原則東入濟入青以達于海而下流與漯為一王莽時河遂行漯川大河不行於大伾之北而遂行於相魏之南則山澤在河之瀕且有支川與河之相貫者悉皆易位而與禹貢不同矣

方氏曰建武後黃河決入鉅野溢于泗以入于

淮者謂之南清河由汶合濟至滄州以入海者  
謂之北清河是時淮僅受河之半金之亡也河  
自開封北衛州決而入渦河以入淮一淮水獨  
受大黃河之全以輸之海濟水之絕于王莽時  
者今其原出河北溫縣猶經枯黃河中以入汶  
而後趨海清濟貫濁河遂成虛論矣

新安陳氏曰方氏得於身經目覩與諸家據紙  
上而說者不同合程王說而參觀之可見古今  
河道之大不同又因方說而後濟水之入河復  
溢出於河者顯然可見矣